

HM -Jammu

गृहमंत्री अमित शाह – जम्मू-कश्मीर च विकास कम्में दा आंकलन करने लेई जम्मू च इक उच्ची सतह दी समीक्षा बैठक दी प्रधानता करा रदे न। साढ़े जिला संवाददाता दी रिपोर्ट मुजब- इस बैठक दरान ढांचागत विकास आले प्रोजेक्टें- सिडकें दे विकास- केन्द्र आसेया चलाई जा'रदी योजनाएं ते पूरी-पराती प्रशासनिक प्रगति पर मुख करी ध्यान दिते जाने दी मेद ऐ। वरिष्ठ प्रशासनिक अधिकारी ते सरबन्धत विभागें दे बड्डे अफसर बी इस बैठक च हिस्सा लै रदे न। एहदे शा पैहले गृह मंत्री अमति शाह हो'रें कल बी इक उच्ची सतह दी सुरक्षा समीक्षा बैठक दी प्रधानता कीती ही ते कन्नै हीरानगर सैक्टर च गुरनाम ते बोबिया आली सरहदी चौकियें दा दौरा लाया हा। उ'नें बन्ने पारा थमां घुसपैठ रोकने लेई बी.एस.एफ आसेया कीते गेदे बंदोबस्तें दा निरीक्षण कीता। इस मौके पर बोलदे होई शाह हो'रें आप्रेशन सिंदूर दौरान महत्वपूर्ण भूमिका लेई बी.एस.एफ दी सराहना कीती।

<><><><><><>

Rajouri –Poonch Rail Line

केन्द्र सरकार नै मती ऊंचाई आहलें- पहाड़ी ते बन्ने कन्नै लग्गदे इलाकें च बेहतर सम्पर्क-राबता जकीनी बनाने लेई रेलवे च विस्तार देने च तेजी आंदी ऐ। केन्द्र रेलवे मंत्री अश्विनी वैष्णव हो'रें कल राज्यसभा च जानकारी दिती जे जम्मू प्रांतै च प्रस्तावित राजौरी-पुंछ रेल लाइन परियोजना गी पैहल दी बिनाह पर लैदे होई- एहदे सर्वेक्षण दा कम्म बडी तेजिया कन्नै जारी ऐ। उ'नें आखेया जे इस परियोजना दा मकसद बन्ने कन्नै लग्गदे इलाकें धोड़ी रेल सेवा गी सखल्ले उपलब्ध कराना ऐ। उ'नें दस्सेया जे बारामुला –श्रीनगर रेल लाइन गी बी होर बेहतर ते निगगर बनाया जा'रदा ऐ। मंत्री हो'रें दस्सेया जे मती ऊंचाई आहलें इलाकें च सकारात्मक नतीजें हासल करने लेई चेचे तौरा पर डिजाइन कीती गेदियां रेलगड्डियां आंदियां जा'करदियां न।

<><><><><><>

Discussion –Budget

मुख्यमंत्री उमर अब्दुल्ला हुं'दे आसेया कल विधानसभा च पेश कीते गेदे बरे 2026-27 दे बजट पर अज्जै थमां चर्चा शुरु होग। सदन दी बैठक अज्ज बड्डलै 10 बजे लग्गोघ ते सदन दी कार्रवाई दी शुरुआत सोआलें दे समें कन्नै होग। मुख्यमंत्री उमर अब्दुल्ला हो'रें कल जम्मू दे कन्वेंशन सेंटर च इक संवाददाता सम्मेलन गी सम्बोधित करदे होई सरकार दियें मुख प्राथमिकताएं, लोकें

बक्खी केन्द्रित सुधारें ते समग्र विकास-बाहें लेई सरकार दे नज़रियें पर लौऽ पाई। उंनं आखेयाजे उंदी सरकार दा मकसद संसाधनं दा उचित ढंगै नै इस्तेमाल करना, राजस्व गी बधाना ते नुक्सान गी घट्ट करना ऐ- तां जे लोडमंदें गी मते शा मता लाहू उपलब्ध करोआया जाई सकै।

<><><><><><>

Army Chief Visit

सेना प्रमुख जनरल उपेन्द्र द्विवेदी हो'रें कल जम्मू-कश्मीर च सेना दी व्हाईट नाइट कोर मुख्यालय दा दौरा लाया ते खित्ते च मजूदा सुरक्षा हालात ते कारवाइयें सरबंधि तयारियें दी समीक्षा कीती। इस दौरान उनें'गी आतंकवाद पर रोक लाने लेई कीते गेदे बंदोबस्तें बारे तफसीली जानकारी दिती गेई- जेहेद पर उनें इनें तयारियें ते बक्ख-बक्ख सुरक्षाबलें बश्कार आपूं-चे दे तालमेल ते सहयोग दी सराहना कीती। दौरे दौरान सेना प्रमुख हो'रें सरबंधित सभ्भनें धड़ें दियें कोशशें ते सहयोग दी सराहना कीती ते सतर्कता बरोबर बनाई रक्खने दी जरूरत पर जोर दिता। उनें कुसै बी इलाके च कारवाई दौरान आम जनता दी सुरक्षा ते हितें दा चेचा ध्यान रक्खने पर जोर भरेया। उनें मेद प्रगट कीती जे व्हाईट नाइट कोर दा नेतृत्व ते सैनिक इलाकें च रमानदारी ते सुरक्षा हर कीमत पर बनाई रक्खने च कामयाब रौहगंन।

<><><><><><>

Nowshera Day

भारत ते पाकिस्तान बश्कार सन 1947-1948 च होई दी जंग दरान 6 फरवरी 1948 गी हासल होई दी ऐतिहासिक जित्ते दे चेते च कल पूरे सम्मान ते देशभक्ति दी भावना कन्नै "नौशैहरा दिवस" मनाया गया। नौशैहरा दे शेर खोआने आहले ब्रिगेडियर उस्मान हुं'दी अगुआई च बलें नौशैहरा कस्बे दा नियंत्रण फही हासल करी लैता हा ते इस चाल्ली एह जम्मू-कश्मीर दे फौजी इतिहास च इक ऐतिहासक ध्याड़ा बनी गया।

<><><><><><>

OTM Tourism

जम्मू-कश्मीर सैलसफा विभाग बी एशिया दे सभ्भनें शा बड्डे सैलसफा ते यात्रा मेले चा इक आउट-बाऊंड ट्रैवल मार्ट जिसी आम तौरा पर OTM दे नां कन्नै जानेया जंदा ऐ- च हिस्सा लै'करदा ऐ। त्रंऊ दिने दा एह आयोजन जेहड़ा 5 फरवरी गी शुरु होआ हा- अज्ज सम्पन्न होआ करदा ऐ। मुम्बई दे जियो वर्ल्ड कन्वेंशन सेंटर च आयोजित OTM-2026 च जम्मू-कश्मीर दे

पंडाल च खरी मती गिनतरी च लोक- निवेशक ते होर हितधारक आइयै जम्मू-कश्मीर च विरासती- साहसिक- धार्मिक- यात्राएं सरबंधि कुदरत दे अनुकूल ते सेहत सैलसफा दियें संभावनाएं दे बारे च जानकारी हासल करै करदे न- जेहदे'नै जम्मू-कश्मीर सैलसफा कन्नै जुडे दे निवेशकें दी पैहली पसिंद बनदा जा'रदा ऐ।

<><><><><><>

Bharat Darshan

जम्मू दे बन्नै कन्नै लग्गदे इलाकें थमां 24 बच्चें गी भारत दर्शन दौरे पर जोधपुर लेता गया- जिस दौरान इनें बच्चें गी उत्थें भारत दी सगोसार संस्कृति ते इतिहास कन्नै जुड़ी दियां केंई नशानियां दिक्खने दा मौका थ्होआ। दूर-दरेडे सरहदी इलाकें च रौहने आहले इनें विद्यार्थियें गी पराने मैहल किले ते होर दुइयां ऐतिहासिक थाहरां दिक्खने दे कन्नो-कन्नी भारत दे सनैहरी इतिहास-सगोसार विरसे ते सांस्कृतिक बन-सबन्नता गी बड़ी कोलै दा दिक्खने दा मौका हासल होआ- जेहदे नै उन्दे अंदर भारत दे बसनीक होने पर मान्नै आहली भावना बी विकसित होई। बच्चें इस आयोजन लेई आभार प्रगट कीता ऐ।

<><><><><><>

Weather

मौसम विभाग नै जम्मू-कश्मीर च अगले किश दिनें धोड़ी मौसम आमतौर पर खुशक रौहने दी पेशगोई कीती ऐ पर उच्चियें धारें पर मौसम च किश बदलाव होई सकदा ऐ। आकाशवाणी संवाददाता नै मौसम विभाग दे हवालै नै जानकारी दिती ऐ जे अज्जै थ्वा मौसम आमतौर पर साफ रौहने दी मेद ऐ। 7 ते 8 फरवरी गी मौसम आमतौरा पर खुशक रौहने दी मेद दस्सी गेई ऐ पर 9 ते 10 फरवरी गी किश उच्चियें थाहरें पर हलकी बर्फबारी ते बरखा होई सकदी ऐ। 11 ते 12 फरवरी थमां मौसम फ्ही आमतौर पर खुशक गै रौहग।

<><><><><><>